

Paoro

E'ejesio

Iyoteparia

Teepotari

1 Kúíra Eejesio tiopachi mochikame. Neee Paoroa Riosie Weratiame Eesusie weratiamepua, Riosi e'rarieo. Neeea i'ka iyojura aamo uhjuriaa, Eejesio mochikame ti'tijoewichiopua ooweru tiame, Riosie piipatetiamechitia mochikamewichioo, aamo Eesusi Riosie Weratiamechio, ki se'wika paparaka mochitoamewichio. ²Neeea, Apoe taamo Noonoo, Apoe Eesusi Riosie Weratiameopua tiameo, wa'api teetojeraninia aamo kiasikaopua ahpo cherirewao, aamo iikachiopua ta'iria mochtomichiopua pukaeo.

Riosi Riosiwarioe kaawe ikiwame

³Teemea taamo Noonoo tewekachi kahtiameo, kaaweruma nayewataria naaju, Apoe Eesusi Riosie Weratiame taamo Paamiraopua, Noonora. Teemea tewekachi kahtiame taamo Noonoo, kaaweruma nayewemepua, taamowichio ki teesa kaaweruma tiame iintoriopua, taamoo ahpo Taana Eesusichi paparariopa. Puuu Eesusi Noonoraa, ahpo ye'karichi tewekachi o'iniaio, tísia kaawe ihsiamepua, yooma ihta itapiti tísia kaawe taamo ikiwa kiasikaopua, i'ka wehjoarichi apochi paparakameopua. ⁴Ihji Noonoraa, ahpo Taana Eesusichi tísia paparama taamo tetewikapa naayachisi o'iniaio, taamo ahpowichio poanatakame, kihta tatakorieme enepamichiopua apochio, ahpo tetewachio. ⁵Tewekachi taamo Noonoo, tísia taamo nakiyapa puuua, ke'chu naayachikoioopua pehjo, paa puuupa taamoo, ahpo tatanachitia tetewiriamepua, ahpo Taana Eesusichi paparamerikoo. Wa'a tiame inatakame taamo Noonoo, tewekachi kahtiamea. Ke'chu Riosi yooma ihtaoi itapiti neteyoioopua naatichitiaio:

taaa, meechao, yomatame muuwari
 so'porioio, wehjoarioiopua, Riosiapa
 taamo tetewame eneriamepua,
 aatanakamera apochi paparamerio.
⁶Pukachipa wa'a tiiachipa kaaweruma
 naewame teemea Riosio, ahpo tísia
 peeniatiwari kaawerumari tamochi
 iintoriopa, taamoo ahpo Taana, tísia
 nakiyamerachi iintapariopa. ⁷Ahpo
 Taanachi iintokame puuua, yooma
 taamo tatakoria nateteniameo,
 ahpo Taana eerara wi'suwarie, pu'ka
 mukiwaeo. Puuua wa'a iintokao, ki
 nu'uti taamo tesiwewa iintokamepua.
⁸Puuua wa'a iintokaopua, ahpo ki
 nu'uti nakirewa taamo ne'netekamepua,
 taamoo ki'yakaopua tiameo, yooma
 ihta peenewariopua, yooma ihta
 pahtewariopua tiame, pu'ka naayachisi o'inia
 taamowichio inatariaopua, ⁹yooma ihta
 ahpo noriwi teereriaopua pehjiio, ehpiami
 wahka ihtoriachi ahpo iintomiaopua. ¹⁰Riosia
 i'ka ihta taawechi asisooa ahpo
 ikitemiachio, yooma ihta iintuameo
 pirenatumeripua, Riosie Weratiame
 ye'karitereopua, tewekachi iintuameopua,
 weechi iintuameopua tiame. ¹¹Apoe
 Riosia ahpo Taana Eesusichi taamo
 paparamio ne'netokao, pukachi inataka
 ahpo ijinuwa iintaparepua, waika o'inia.
 Pukaepa wa'a iintokame Riosia, wa'a
 iintonareriamekapa, puuua, ahpo
 iintonariaa ki wa'atia itipiamepua
 ahpo iintonareriaio. ¹²Pu'ka ahpo
 iintonareriaa Riosia, tamochi
 iintokamepua pahchao, i'isaerichio,
 teeme pukeri pahcha Riosie Weratiamechi
 paparakameopua, Riosi te'ta weruma
 nakirewara tamochi te'tereka
 mochitomichio. ¹³Ehpeo eemea ki
 i'isaeri ti'tijoea oowerua tiame,
 Riosie newipatewa pichikekamekapao,
 ahpo Taana Weeraria ahjama enepatekamepua,
 tamochítia. Wa'a iintokaopua Riosia,
 te'ta ahpo ijinuwa iintapakamepua,
 ahpo Riosiwari ahjachi yasipateka,
 apoe Riosia, iintomo cheeriachitia. ¹⁴Ihji
 Riosi Riosiwari te'ta kaawerumariaa,
 puuua te'ta Riosie taamo nuutewa
 kiapua, pichiwatamepua, wahka
 ihtoriachi Eesusi ahpo Taana tamochi
 enasooopua, iintopuame. I'ka Riosie
 Weratiameo taamo apechunamia enasooopua,
 i'ka weechi nanaarame mochikameo,
 taamo puhjekaopua wa'asi, tewekachi
 ahpo kahtiachi apechunakao. Teemea
 waikao, wa'a iintoriokamepua pu'kao,
 ki nu'unti tísia kaaweruma nayewame
 teemea, taamo tewekachi kahtiame
 Noonóo, ki nu'uti cheriwema ki'yaka.




Illustration by Katie Vogtlander

*Ke'chu Riosi yooma i'ka
 teteiwa neteriaioapua,
 tísia tamochi inatariaame
 puuuapa. (1:5)*

**Paoroa peenewari itaniame Riosio,
Eesusichi paparakamewichioo**

¹⁵Pukaepa neeea, Apoe Paamira Eesusichi aamo ahjachi erakoame inamukapao, aamoo yooma Riosichi piipakameo, kaawe ahpo nakika mochiko tuuopao, ¹⁶senepi Riosichi nayewaio, tísia cheriwema ki'yamenia pu'kao, amochi kaawe teetoachiohua, amochi yasitoamekopua Riosio. ¹⁷Neeea tewekachi taamo Noonoo tísia tisiwariemeopua, taamo Paamira Eesusi Noonoraoo, pu'ka peenewari tísia pahtewari tiame itaniamenia, pu'ka ahpo Taanachi simiyame aamo ma'chiteria, tísia kaawe peeneka pahtemichiohua. ¹⁸Neeea Riosio itaniamehua tiameo, ma'chiame aamo pahtemichiohua, ihtanakoohua Riosichi aamo puuyetoka mochitoao, pu'ka nane'remichio aamo paajuteriao, yooma ahpo ijinuwa iintapariao. ¹⁹Riosio itaniamenia tiameo, aamo ku'imichiohua pahtetekao, aachin tiame ki nu'utikopua ahpo utewario, pu'ka ahpo utewari ahjae taamo newipaterio, yooma taamoo, Riosichi paparakameo. ²⁰Riosia pukae wa'api tísia weruma utewarie, oijenatekamehua ahpo Taana Eesusiohua, wa'a iintosaopua tewekachio, te'ta weruma tiamera yasira ki'yakamehua Eesusio, pu'kao ahpo ahjamina yasimichiohua. ²¹Ihji Eesusi yawichituniamea, yomatiamé wehjoarichi ya'yawichi aampa tiamehua, yooma ihta te'ta tiame utewari yoorewiniameeopua, yomatiamé aampa tiameopua, ahkaoi weechio, ahkaoi tewekachiohua tiameo, ihta taawechioi ehpe taawechiamiohua tiameo, ahkasi wahka ihtoriachi taawechiohua tiame. ²²Riosia yooma ihta iintuameopua, yooma ahpo Taana Weerariatere iintapakamehua, puuuu ahpo Taana Weerario, mo'orawa iintapakamehua yomatiamé ihta iintuameopua. Riosia ahpo pirenatura ijinuwaopua, ahpo Taana weerarehua mo'oratumichioo, yomatiamé ahpo tiopa ki pusie teteiwameoipua. ²³Puuu Riosi tiopawa ki pusie teteiwamea, Eesusi Riosie Weratiame weerewarakaitehua, Eesusi Riosie Weratiame Riosiwario, pukachi pochikame kahtiamekopua. Puuu Riosie Weratiame Riosiwari tisiwa tiariraopua, yomatiamé ihta itapitichiohua, pochikame kahtiaitehua.

Riosi nakiwae newipateniamé taamo tatakoriario

2 Pukerio eemea mukukameka te'tereriaipua, tatakorika mochitoamekapa pehjio, ²ki ka'karuma nokiwame na'naritoamekapa, i'ka weechi nokiwame, Na'arari Noonora e'rárira, eekachi oiyame Satanasi tewaniame, kiisi pusie tetewiniame. Puuuu ti'tijoe iikarachio ooweru iikarachiohua tiameo, ahpo e'rakamera nokitiamé, kiisi Riosichi paparanariameopua. ³Yooma teemeai pukeri

ki Riosichi paparariaiopua pehjo, wa'achi nokaka mochtokamepua, taamo wa'api eraniamera nokaka, ki Riosikamera e'rarira nokaka. Wa'a te'teriapa teemea, Riosi kokosarichikamera uhjurapo teereriai teemea, yooma aataai, ti'tijoeo ooweruopua tiameo, kiisi Riosi e'weka mochtionariameo. ⁴Nape Riosia pu'kao, ki ahpo ahjama mochime te'tereriopua, pu'kao tísia tatakorikamekoiopua, ki nu'uti nakiwari iinuemekapapua taamo ti'tijoerichio, ki nu'uti taamo tesiwa e'rekamepua, ti'tijoeo ooweruopua tiameo. ⁵Riosia, wa'a tiame ki nu'uti taamo nakiyamekapao, taamo apochi uukamepua, Eesusi Riosie Weratiame taamowichio iintoria pichikeriopua. Tatakorichi ohjoapa teemea pehjo, mukukamekate teemea, nape taamoo cheriwesoopua Riosio, eenechi ahjakameka enepame teemea, Riosio weemera ahjari taamo ki'yamekopa, Apoe Riosie Weratiameo taamo tewiteria, eenechi oijenaka. Wa'a teeso Riosi cherirewachiche newipateniame eemea aamo tatakoririao. ⁶Riosia taamoo ahpo Taanachi paparakame enepakopao, pu'ka ahjama mukuka oijenakame taamo tetewame puuua, Eesusi oijenateriaiopua. Waika o'inia Riosia, Riosie Weratiame ahjama taamo mochikame tetewamepua, te'pa tewekáchio. ⁷Riosia wa'a tiame tetewimeripua tiameo, yooma aata ti'tijoe ooweru tiameo, ahpo Taana Eesusichi paparasiameopua, ahpo tísia nakiya nane'repatesinariapapua, ahpo kaaweruma tuuyewari pichikesiameopua, pu'ka ti'tijoeri tatakoriria cheriwesiwachiopua. ⁸Wa'a tiachipa yooma tamochitia Riosie cherirewachiche newipatiamepua, yooma aata ahpo Taana Eesusichiche paparariaecheopua, kihta natekachi, kihta yoorariawichiooi. ⁹Wa'a tiame inatakame Riosia, kihta taamo iintoriae newipatekáo, ki aata ahpo oisa eramichiopua, ahpo iintoriae newipatetiameko e'rakao. ¹⁰Riosia enepatiame teemea, itapiti tísia nateyame netetiamechitia. Wa'a tiame taamo netekamepua, taamoo ahpo tísia nateyame ka'karuma yoratoka ohjoretomichiopua, taamo wahjachio, Riosichi eename tísia ka'karumari tetewitemichiopua, ahpo pukeri naayachi o'inia ahpo inatária.

Riosie Weratiamechi paparapa, ta'iria mochiwame iikachi

¹¹Nane'riame eemea ke'chu Riosie Weratiamechi paparaio, kihta eneriai eemea Riosichio, oowera seesenuchitia te'tereriaipua Riosichio, kihta machiyamekapa Riosi tiiao. Eemea ki i'isaerioi eneriamepua, pukaepa i'isaeria aamo seesenuchitia tetewariaipua. Aamoo i'isaeria ki aamo siichitepuwaka ohjoekopao, ki siichitepuwatiame aamo tewariaipua. ¹²Eemea pu'ka taawechemio, kihta te'tereriaiopua tiameo, Riosie Weratiamechio, i'isaeri ti'tijoechioi, kihta te'tereriai eemea. Wa'a te'teriapa eemea, kihta machika ohjoeriaipua Riosichi simiyameo, Riosi kateweria i'isaeri

ti'tjoeri ahjamaopua, Riosioi i'isaeri iintokemo tuuriao. Pukaepa eemea, kihta puuyetoka mochitoriaipua Riosio, yomatiam wehjoarichi ti'tjoeri iintokemo tuuriao. ¹³Nape ehpeo eemea, Riosi ahpo Taanachi aamowichio iintoria pichikekapao, Riosichi kaawe te'teriamepua; eemea pukerio, mehka mochikameka teereriaiopua Riosichio, Riosichi te'terepatetiamepua, Riosie Weratiame iintoria, pichikekapa. ¹⁴Apoe Riosie Weratiamea, apoe iintokamepua puhjekao, aamo seesenuchitia mochitowa tetewiwao, yooma ihta aamo pejana teereriaopua, i'isaeri ti'tjoechiopua ki i'isaeri ti'tjoechiopua, yooma aamo ihta, Riosichi kaawe te'terepua, eerina teereriaopua. Wa'a iintoka Riosia, i'isaerio eeme ki i'isaerionpua tiameo, piipiri wa'api ahpo mochiwari iintapakamepua, na'pa eeme aamo seesenu mochiwari, ahpo Taanachi paparariopa. ¹⁵Wa'a iintoka Riosia ahpo Taana mukiwaeo, wa'asi werapakamepua, ehkoriaami o'inia Moise nuurari, Riosie kiaretiatere mochitoniamero, ki ookapi e'wewa ki ahsepame tiimeterere mochitoniamero, ahpo tatakoria cheriwepuwichio; nape pu'ka Moise nokiwao ki ahsieme nateteniame ahpo Riosie kokosapuame wikiria. Nape Riosie Weratiamea, ahpo mukiwae te'ta ahsieme natetekopa taamo tatakoria Riosie kokosapuameo, i'isaeri ki i'isaeri wa'achitia, aaataa ti'tjoeri tatakoria, ahsieme cho'weniamepua Riosio, ahpo Taanarachiche paparasoche. Wa'a tiachipao Riosia, apoe wa'api iintokamepua ahpo Taanao, pu'ka ooka ti'tjoeturi mochitowao, piiripi wa'api weemera Riosi mochiwari iintapakao. ¹⁶Riosie Weratiamea apoe mukuka wa'asi weraparepua, na'pa mochiwari ahpo seesenu eneniamero, Riosichikamera kaawe te'terepuuwichio. Wa'a tiachipao Eesusia, isaeri ti'tjoerio ki isaeri ti'tjoerikooiopua tiameo, ahpo iintoriaopua kurusichi mukukao, kaaweruma te'terewari enepaterepua Riosichi pirenapatakao, piiripi wa'api ahpo weerewachi pirenatukame enepatekoo, ahpo weerewa ki pusie teteiwamechiopua. ¹⁷Riosie Weratiame eenakao, amochi nayewaturepua Riosi kaaweruma tuuyewario, aamo kaaweruma te'teremichio Riosichio, ki isaeri ti'tjoerionpua, aamoopua, mehka te'tereriamero Riosichio pehji, i'isaeri ti'tjoerio ki Riosichi mehka te'tereriamero tiame. ¹⁸Ehpeo tamochi iinuekapa teemea pu'ka Riosi kaaweruma tuuyewario, yooma teeme i'isaeria ki i'isaeria tiameo, kaawe te'teriamero teemea pu'ka Riosi kaaweruma tuuyewarichi taamo paparasoopua, Riosi ahpo Riosiwari tamochi yasitoniamero. ¹⁹Wa'a tiachio opua ehpeo eemea, ki seesenu eemea Riosi ijinuwara mochiwarichio, eemea ehpeo Riosi ohjirachikamera ohjoemepua. ²⁰Ehpeo eemea tiameo, Riosi ahjae karitaniamero, Riosio ahpo kariwa ahjae karita, itapitichi tisia pewatiame nawateka. Puu tisia pewatiame nawateka karitaniamero, Riosie Weratiame

ajawariapua, ehkoriaami Riosi na'nayewatura tiame, waika o'inia masitesiria Riosichi simiyameo, ahkasi ehpesiami tiame, Eesusi ajawaria masitesia. Nape Apoe Riosie Weratiamea, te'ta nateyamera tehtepua, kaari te'ta pewatiame nawaterachi yachatiame, pukeri kaari nawatera o'icharichi te'ta yachatiame. ²¹Pukachi te'ta nateyamera tehtechio Riosia, ahpo kariwa werisipuamepua, taamoo yoomahkae pu'ka Riosi kaari ki teteiwame, sa'mitewarachi to'wesiamechitia, ahkasi ahsepari kajuyachisi Riosi kaarira weraniameo, yooma taamo Riosiwichio piipatetiameeo. ²²Eeme ki i'isaeri ti'tijoea ooweruaiopua tiame, Riosi kaarira enepakame eemea, amochi yasitoamekopa Riosi Riosiwario.

Paoro weraretia, Riosi kaaweruma tuuyewari, ki i'isaeri mochikachiami nayewatumichio

3 Nee Paoro Riosie weratiamea, i'wa perekarichi no'o kahtiaa, Eesusi Riosie Weratiame kaaweruma nayewari, nayewatuapa i'wa yachatiamenia, yooma aamo ki i'isaerio, Riosichi kaawe te'teremichio. ²Nane'riame eemeapa Riosio, aachin teeka no'o tesiweriopua weerakao, aamo ahpo kaaweruma tuuyewari nayewatumichio, yooma aamo ki i'isaeri ti'tijoeo, ooweru tiame. ³Puuu Riosi kaaweruma tuuyewario, ahkasi ehpiamisio noriwi teereriaipua pehjio, puupua apoe Riosia, noochi ma'chitaka, pahtereria, pu'ka teesa ma'chiteka aamowichio iyotiamenia. ⁴I'ka aamowichio no'o iyotia aamo uhjurewesoopua, nane'remapua eemea no'o aamowichio iyoteria yonasaapa, Eesusi Riosie Weratiamechi simiyameo, aachin tiame no'o pahteria Riosio. ⁵Ihji Eesusichi simiyamea noriwi Riosie teereretiaopua pehjio, pukeri ehkoriaami Riosi na'nayewaturachisi o'inia, Riosia Eesusi ajawaria ma'chitekamepua no'oeo, yooma Eesusichi simiyame na'nayewaturaopua tiameo, Riosi Riosiwari pukachi yasitoka ku'isikaopua. ⁶Puuu ehkoriaami mochiriame ki pahteteka mochitetiamea, ahkasi ehpiamisio ihji puuu: Riosia ahpo Taana Eesusichi iintoriaeo, Eesusichi piiripi pirenaturi iintaparepua, yooma ihta ti'tijoeriopua, pukachi paparakameo, i'isaeri ti'tijoerio ki i'isaeriopua tiamé. Na'pa puu ooka ti'tijoeturi Eesusichi Riosie piiripi pirenaturi iintapatiamea, Riosie Weratiame ki pusie tetewiniame weerewarachi te'tereniamepua, wa'a te'teriame enepakapaopua, kiapuamepua Riosie nuutewa kiamo tuuriao, yomatiamé ahpo Taana Eesusichi paparakameo. ⁷Neeea, kihta kaaweruma enekamekaio, Riosia no'o tesiwekamepua, ahpo kaaweruma tuuyewari nayewatumichio weerakao, no'oo ahpo te'ta utewarie noochi yahchaka, no'o ku'itomichioopua. ⁸Neeea Riosichi te'ta te'teriaméchio, ki epeche no'o tiameko e'ramenia, ohsotia

neeea noochio no'oo, epeche nu'utirako no'o e'ramenia pukachio; nape wa'a no'o e'roipua noochio, Riosia no'okamera uukamepua, ki i'isaeri mochikachiami nayewatumichioo, i'ka ki nu'uti nateyame ahpo kaaweruma tuuyewari nayewatumichio, ahpo Taana Eesusichi simiyameopua. ⁹Riosie weratiameia tiameo, yooma ti'tijoe ooweru tiame ma'chitemichiopua, i'ka Riosi iintomo e'rariaopua, ahkasi naayachi o'iniaopua, ahpo noriwi iinueraiaopua pehjo ki ma'chitaka. Wa'asa iintomo e'rariaopua, yooma ihta itapiti enepatekamea i'ka wehjoarichio. ¹⁰Yooma Riosie iintomo e'rariaa, tewekachi ahpo te'ta peenewari tetewipuawichio iintokamepua, tewekachio yooma ihta yawichituwa te'terewachiopua. Puuu tewekachi ohjoemea, aapoe tetewamepua Riosio, achini ihsiamepua i'ka wehjoarichio, ahpo te'ta peenewarieopua, ahpo ki ookapi iintomo e'rariaopua. Piiripi tisia peenewari Riosi iintoriaa, ooka i'ka wehjoarichi ti'tijoeturi pirenatutiame puuua, i'isaeri ti'tjoeri ki i'isaeri ti'tjoeri, pu'kao Riosia, na'pa ti'tijoeturi mochtowario, ahpo tiopa ki pusie teteiwame netetiame. ¹¹Yooma i'ka Riosi iintomo e'rariaa, naayachisi o'inia inatariamepua, iintonarewaa, taamo Paamira Riosie Weratiamechi, Eesusi ahpo Taanachi. ¹²Pukaepa teemea ehpeo, taamoe wa'api iinueme teemea Riosi ahjama taamo nayewamiao, ahjachi oowe erakoka, kihta seeweka tiame, Riosi ahpo Taanarachi iintoriopa, Riosi Taanaroo ki nu'uti taamowichio iintoriopua pu'kao, taamowichio mukuriopa taamo tatakoriaa ahsieme cho'wepuawichioo, taamo apochi aparasoopua. ¹³Wa'a tiachipa itaniame neeea aamoo, ka'chi erakomichiopua, aamo mochikachi Eesusichi simiyame nayewatukapa, no'o peereso yachatiamkoopua. Ohso kaawe eemea kaawe erakopuapua, Riosie no'o wa'a uhjuratiamekopua, ahpo kaaweruma tuuyewari aamo nayewemichio, ahpo Taana Eesusichi simiyame.

Riosie Weratiame, yomatiam ti'tijoeturi nakiya

¹⁴Pukaepa neeea, yooma Riosi ahpo te'ta machiwarie iintomo e'raria inatapasaapa, chopokorieka weweripamenia Riosie Weratiame Noonora te'ta iyoriwa ki'yakao, ¹⁵apoeopua yooma ahpo Taanachi paparama enepakopao, taamo ahpo tatana iintapariopua, i'ka wehjoari taamo mochikameopua pehjo, te'pa tewekachi ahpo i'toriaopua tiameo, pu'ka wahjipakameopua wa'asi. ¹⁶Neeea Riosio, ahpo tisia peeniatiam paarasarichi uuka, utewari anachianame aamo kijaeraninia, aamo iikachi teeretomichiopua ahpo Riosiwari ku'ikao. ¹⁷Neeea Riosio itaniamenia tiameo, Riosie Weratiameopua epeche epecheche amochi aamo ahjama teeretomichiopua, aamoo Riosie Weratiamechio, te'ta aamo oowe erapachisi pukachio. Neeea aamo Riosi nakirawachio, ki e'nekuma teeresi nawatajeramenia, ¹⁸aamo

kajume eramichiopua pahtekao, yooma wahjachi Riosie piipatetiame ahjama, Riosie Weratiame nakirao, ki nu'uti tiamekopua aamochio: ahkasi tewekachi keenako nakirao, ahkasi kawiyana ki wahjiamesi, ahkasi tetuyanasio ki wahjiamesi, ahkasi cherayachisi ki wahjiamesi, ahkasi ariyachisiopua tiame ki wahjiamesi tiame. ¹⁹Ki nu'uti pichiwa amochi teerejeraninia, pu'ka Riosie Weratiameo, ki nu'uti tiamekopua amochi nakirao, kiisi ahsepame tiamekopua chanikao, kiisi ahsepame tiame pahtekaoi; wa'a teerejeraninia amochio, wahjachi aamo tetewameo, Riosie amochi pochikame yasitoame tetewimichiopua. ²⁰Ehpeo neea Riosio, tisiwa peenia tiame chaachapajeraninia pu'kao, pu'ka Riosio ahpo utewarieo, epeche iintome tiamekopua, ahkasi epeche ki nu'uti taamo itayachitia, ahkasioi taamoo ki ahsepame tiame inatacao. ²¹Ehpeo teemea, taamo tewekachi Noono ki pusie teteiwame tioparachi mochitoamea, te'ta pichiwari Eesusi Riosie Weratiamechi paparakamea, ahkasi tewekachi asiyame ki nu'uti iyoriwa ki'yame teemea, ahkasi ki wahjiamesi teetowame.

Riosi Riosiwarié pirená nokisiniame

4 Nee Riosie Weratiamechi simiyame nayewatuapao, karichi yachatiamenia, aamoo neea, Riosi te'ta mochiwarichitia mochitojerapa, Riosio aamoo, ahpo ijinuwa teewariopa. ²Eemea aamoo, ka'te weruma aamo uuka mochitomitiapua; ohso kaawe kaawe aamo uuka ku'ika mochitopuapua. Ka'te ikanati ki kaawe chaachanimitiapua aataaoi; ohso kaawe eemea, kaawe aamo nakika ku'ipapuapua. ³Kaawe aamo neesetoka mochitopuapua, ki a'chi tiame teeremichiopua aamo apochio, aamoo Riosi Riosiwarié, aamo pirenatutiameo. ⁴Teemea piiripi wa'api weerewachi pirenatutiamepua; teemeai tamochio, piiripi wa'api Riosiwari iinuemepua; teemea tiameo, piiripi wa'api paajutetiamepua, itapiti tísia peenia tiame uumichiopua, taamo Noono tewekachi kahtiamee, taamo nuutekeniameo. ⁵Teeme piiripi wa'api Paamira iinuemepua, tewekachi o'inia taamo ne'neka yasitoame; teemea piiripi wa'apichi paparamepua, apoe Paamira Riosie Weratiamechi; teemea piiripi wa'api paatoniamé iinuemepua, Riosi Riosiwarié taamo iikachi paatoniaméche, Riosi Taanara Eesusichi taamo paparaso. ⁶Teemea piiripi wa'api Riosiemepua, puuupua apoe te'ta taamo Noonoa, yooma taamo Riosi Taanarachi paparakameo. Puuupua tamochi tiameo, yooma tamochi neesetowao. Puuua apoe pua tamochi noonosiamea, ahpo erasia iintonariaa, taamo weerewachi yasitoamekapa puuua. ⁷Taamo Noono tewekachi kahtiamea tiameo, taamoo muuwaeme itapiti ye'kari taamo ki'yakamepua pipiripichio, yoomahka teeme pipiripio, ahjae taamo nokisimichiopua pu'ka ahpo ijinuwachio, yooma ihta itapiti Riosie Weratiame yorajerasichiopua. ⁸Riosia ahpo

Taana Riosie Weratiamechi simiyame nayewakao, ehkoriaami Raawi ahpo nayewatura iyotetiaio, eee cheerepua:

Puuu Riosie Weratiamea,
 muuwaeme tatakorie chapitiame,
 na'sonatiame i'toka eenechi tewekachi moenasaopua;
 yooma weeechi mochikame pehji ahpo ijinuwa piipateriao,
 muuwaeme ye'kari ihkokewa ki'yakamepua,
 ahpo ijinuwa ti'tijoe ooweruopua tiameo,
 ahpo weerewa tiopachi ki pusie teteiwamechi te'teriameo,
 pukae ku'isimichiopua wahjachi apochitia piipatetiameo.

⁹“Eenechi tewekachi moenasaopua”, chanitiamea, “tewekachi o'inia tekisa eenechi moenario”, tuuniamea, i'ka wehjoari kiisi weruma tiariamechi. ¹⁰Puuu tewekachi o'inia tekikamea, puuu wa'api eenechi moenakamepua tewekachio, wa'a moenasaopua wa'a yasipakamepua yawichitumiao, yomatiamae ahpo enepateria yawichitumia, pusie teteiwame ahkasi yomatiamae ki wahjiamesi ki puusie teteiwamesi, yooma ihta ahpo enepateriachisi pochikame yasaka. ¹¹Ihji wa'api Eesusi moenakame iintokamepua weeechi mochikame ki'yakao, aachin teeka ahpo ku'ika mochitomichiopua apochi paparakameo, i'ka pepeniwari ye'kaniamechitia: Riosie Weratiame aaata ajawariachitia; wahjachi pepeniwarichitia, Riosi tuuyewari ma'masitari; wahjachi pepeniwari kiatiamea, ahkaoi mochiwachiami Riosi kaaweruma tuuyewari tuusimichio; wahjachi pepenewari kiatiamea, ti'tiopachi paamiratumichio; wahjachi tiameo pepenewari kiatiamea, nanapawiniame kaawe ma'chiame tuuyeka masitemeri, Riosichi simiyame tuuyewario. ¹²Riosie Weratiamea, wa'a teeka katewamepua ahpo ijinuwao, ihta ahpo tehkiwao, kaawe pepeneka yooraka mochitopuwichiopua, wa'a teekao, epeche epeche kaawe te'teretopuwichiopua taamo Noono Riosichio, Riosie Weratiame weerewarachio, yoomahka teeme pirena nokisika. ¹³Wa'a te'teretomete teemea, taamo pirena wa'achitia erakowa teeremichiopua, taamo Noono Riosi Taanarachi paparaniameo. Wa'achi erakoame te'terepasaapa teemea Eesusichi paparaniameo, iwapakame enema teemeapa, Riosie Weratiame tiarichi simiyameo. ¹⁴Riosie Weratiame tiarichi iwapakame enesaopua teemea, ka'chi iika ikanati sewina erapatepuame teemea, ihtaohi sewina weemera tiame masitewarieopua, aaata taamo wihkuemia enakameeopua. Teemea Riosie Weratiame tiarichi iwapakamekapao, ki kukuchi nu'nuntichitia ikanati pichiketepuamepua, aataae itapiti ahpo chaanetiaeo; ki aataae i'ka wehjoarichi ohjoeme taamo apochi eejepume tiame teemeapa. ¹⁵Pu'ka wa'a nokayame taamo wihkuenarioo, ohso kaawe Riosi pichiwari inatakache itipipuapua, kihta nekamuwa chaaneka. Epeche epeche pepenipaka

mochitomete teemea Riosie Weratiamechi te'teretowaopua, Riosie Weratiame weerewarachi itapitirachitiaopua, Eesusio taamo mo'orachitia te'teretoeka. ¹⁶Riosie Weratiame taamo mo'orachitia te'teretoame enesaa teeme, kaawe te'teretoame enema teemea Eesusichio, Eesusi weerewarachi itapitirachitia te'teretokao, yooma pipiripi teeme ahpo yoramia kaawe teeretowa yorasika. Yooma teeme pipiripi Eesusi weerewarachi itapitira kaawe nokisiam e nesaa, kaawe ahpo wa'achitia ku'itoka nokisiam e nesaa, kaawe ahpo wa'achitia nakitoka.

Weemera te'tereka ohjoeniame Riosie Weratiamechi

¹⁷Pukaepa i'ka aamo chaaniamenia Eesusi Apoe Paamirae weratiamechitia, ka'te ki Riosichi paparamechitia nokimitia eemea, aapoe wa'api ahpo erakoa nokayamechitia, pu'kao kihtawichio kaawekame. ¹⁸Puuu ahpo wa'api erakoakamera nokayamea, tukapachi te'teriamepua ahpo inatario, ki Riosi uutapari inatarichi. Puuuu, kiisi uunareka mochitoamepua, Riosi weemera ahjario ahpo kianarewao, peewamekapapua ahpo iikachio, kiisi sewina erapanariamepua ka'karumachio, kiisi toinariapa ahpo ki ka'karuma nokiawo. ¹⁹Puuu kihta suuwe erakoamepua ahpo ki ka'karuma nokiawachi yokipakamekapapua, yooma ihta eiwepua tiame, pu'serewa nokiawachi. ²⁰Eemea Eesusi Riosie Weratiame tuuyewari pepenipao, pu'ka wa'a nokiawameo, kiisi kaaweko tiame pepenipakamepua. ²¹Wa'a tiachiopua eemea, Riosie Weratiamechi pepenipakapa, kiisi kaawe tiamekopua wa'a nokiawo, ²²yomatiam e pu'ka ki kaawe nokiawo, toipuapua wa'asi. Puuu ke'chu Riosie Weratiamechi paparai nokariaa, ahsieme ki ka'karuma nokiawamechi wekaniamepua, aamo iinya tiame yooraka mochtionareriaa. ²³Eemea ehpeo yomatiam e aamo weemera te'terewachi enemetepua, ahsieme kaawerumachiche inatatoame, kihta inatapuawichio wa'asi aamo ki kaawe nokinarewao. ²⁴Eemea, aamo weemera ahjariwa tiia tetewitepuapua, weemera Riosi tiariwa enepatetiamekapa Riosieo, aamo weemera Riosi tiariwa te'teriam e tetewimichiopua wahjachio, te'ta Riosi ka'karumari aamo nokayame tetewiteka, kihta suwepori ihsiwa tetewitiame. ²⁵Wa'a te'tiamekapa eemea, kihta wistuame enemitiapua; ohso kaawekamera aamo ahpoo te'ta pichiwaka nayewepuapua, yoomahka teeme pirenao, piiripikai tiamekapa, Riosie Weratiame weerewachio, ki pusie teteiwame weerewachio. ²⁶Ka'te aamo newitote nekarewao, aaata aamo na'ra iintokoio, itapiti aamo nekame tiame chaaneokoio, nekarewae aamo newitotesaamua, tatakori iintoame muuuu. Aaata ahjama nekasaamu, ikanati aamo katewepuapua pu'ka ahjamao, pu'ka wa'api taawechioio, ²⁷riaorósio ki amochi iintomichio nasiwatekao.

²⁸Pukerio ichikoame enekaio, kihta inatepuapua aamo ichikomiao; ohso kaawe tekipanaka yowipuapua aamo nakiwiao, soparame iinuemichiopua aamo ko'komiao, ahkasi aamo aaata ihkokemiaoi, tesiwa te'tiamekoopua kihta ko'kometieo.

²⁹Eemea aamo chu'wachio, ka'te chiiame enemitiapua, itapiti nekame tiameo, ihtaai ki kaaweruma chaniwao; ohso kaawe kaawe e'reka nayewiame enepuapua aamo wahjachio, kaawe wichiame inamuniameteerewaeme.

³⁰Ka'te yuuwesitemitia eemea Riosi Riosiwario, ki kaaweruma aamo noonowisoo tísia yuuwesiamepua, tewekachi taamo Noonoa, ahpo Riosiwari amochi yasitopatekamepua, aamo tuuyesimichiopua aamo eeyowa teeresoopua ki kaawerumachi aamo wichipua. Riosia ahpo Riosiwario, ahpo ijinuwa iintapariache ki'yamepua, pukae kakupachiche aamo teetomichiopua, ahkasi wahjiame taawechisi Eesusi Riosie Weratiameo, eenechi tekiyachisi tamochio, ahsepari taamo newipatemiaopua.

³¹Eemea ihpapamitia wa'asio, pu'ka aamo chipurewa tiameo, aaata aamo nekamuchewa erakoao, aaata ahjama nekakoniameo, siinto e'raka chaniwame nayewakao, aaata na'arewa nokiwame, wa'ikisa yooma ihta kiisi kaawe nokiwameo. ³²Kaaweruma enemitia muuu naaju amochio, tesiwe e'reka nayewiame enepuapua aaatao, tesiwe e'riame enepuapua aaatao. Eemea aamo ahpo wa'achitia cheriwame enepuapua, aamo ki kaawe yooraretiaio, Riosi iintoriachitia aamo cheriwekao, aamoo, Riosie Weratiamechi aamo paparariopa.

Achini teeka ohjoeme tiia Riosi tatanaraa

5 Wa'apenatio Riosi nakiya tatanarakapa eemea, kaawe aamo nakika ohjoepuapua, Riosi aamo nakika yasitoachitia. ²Wa'a teeka ohjoremitia eemea, Riosie Weratiame taamo te'ta nakiriachitia, Apoeopua taamo te'ta nakiyapao, ahpokamera ki'yariopua meripuawichioo, ahpo pejana po'wachitia Riosi oowepakao, taamo tatakoria Riosie piipatepuawichioo, Riosia ahpo Taana meritiameo, peeniakame saekamepua. ³Riosi tatanara enepatetiamekapa eemea, kihta suwepori nokiwame amochi tetewitemeripua, a'chi tiamekoiopua, suwepori



Eesusia taamo tatakoria natetewawichioo, ahpo wa'api taamo pejana Riosi po'wa oowewarichitia nehjarepua ahpo meriwachio. (5:2)

nokiwameo, ihtaoi ki kaaweruma simiyame aamo weemuwario. ⁴Ka'te nayewamitia eemea, iinya tiame chaachapaniameopua, itapiti kiisi inatari nayewaniameo. Ka'te tamojeramitia eemea, aaata iinya tiame chaaneкаи. Kiisi kihta nayewamete eemea wa'a tiameo. Ohso kaawe eemea, cheriwema kiapuapua Riosio, apoe iintokamekopua, kaaweruma aamo iintapakao, aamoo ki iinya tiame nayewamichiopua. ⁵I'ka no'o cheemiao, inataka inamumitiapua: Aawataai ki ahpo uupimache uupitaniame nokiwamea, ooweruai ki ahpo kuunamache kuunaniameaio, ki reesisepuamepua Riosie Weratiame ye'karichi mochipuawichioopua, Riosi wa'api ye'kariwachio; aawataai puuua, ahpo weerewa ikotuwache i'yamea, eiwepua tiameche nokayamepua. Aaata tahpitika e'ramea toomichioio, ihtaoi itapitichi ki kaawerumachi weemuameo, ki reesiseri Riosia ahpo ahjama ohjoemichiopua pu'kao ahpo ye'karichio, pu'kao, ahpo toomichiche riosiwakamekopa. ⁶Ka'te aamo toa aaata aamo wihkuemichio ahpo wistukieo, puuu aamo wihkueniamea, oowera aamo wistukiamepua. Puuu wa'a tiame nokayamea, apochi wchitemiitepua, Riosi kokosari nekarewao, ki Riosi chiiamekamera, ma'masitiamekopua pu'kao. ⁷Wa'a tiachipa eemea pu'kao, ka'te pichikemitia pu'kao. Pu'ka masitia pichikesaa eemea, ahjama te'teriame enema eemea; wa'a aamo te'teresoo Riosia, aamo kokosamapua. ⁸Pukerio eemea tukapachi ohjoereriaipua, ki machiyapa Riosichi te'tereniameo, nape ehpeo eemea Apoe Riosie Weratiamechi te'terepakamekapao, Riosi uutaparichi ohjoemepua, Riosi te'ta kaaweruma tuuyewari taajenarichi. Eemea te'ta Riosi uutaparichi mochitoamechitia, aamo tetewitepuapua. ⁹Pu'ka Riosi kaaweruma taajenarichi ohjoetoamea, kaaweruma e'rarie ihsiaame enemapua ahpo piirechio, ki se'wika Riosi nakiyachitia, puuua pichiwakache nayewamapua. ¹⁰Eemea te'ta Riosi pu'seriachitia, mochitonareka ohjoepuapua. ¹¹Eemea tukapachi simiyameo, ka'te wa'achi nokisimitiapua, puuu tukapachi nokiwamea, kihta kaaweruma machenamepua; ohso kaawe eemea pu'kao, terika tuuyepuapua pu'kao, ahpo tukapachi nokayao, kiisi kaaweruma nokiwameko tuukaopua pu'kao. ¹²Utewaeme teripuapua pu'kao, pu'ka noriwi nokayao, ki nu'uti suwepori nokayameko tuuyeka, kiisi chanime tiame iinya tiame. ¹³Nape yooma itapiti taamo nokiwao, Riosi tuuyewari taajenarichi ma'chipa tiiapa, ma'chiame tetewipuamepua, kaawerumakoo ki kaawerumakooiopua. ¹⁴Pukaepa chaachapaniamepua: Pusasa muuuapa, kochika tiamea. Werisisa muuuapa, wahjiparichi tiamea, Riosie Weratiameo, aamo tahjepamichiopua. ¹⁵Eemea amochio, kaawe amochi ne'nemitiama aamo nokayao. Aamo pusakame yasitopuapua inatarichio. Ka'te kihta peenewari machiyame enemitiama; ohso kaawe eemea, te'ta peenewari tiame enemitiapua, Riosi nakiyamera

kaaweruma teetowara. ¹⁶Senepi taawechi aamo teetoachio, kaaweruma pooe ne'neteka mochtopuapua aamo wahjachio, tísia tehki tiame teetoamekopua ehpe taawechiamio, i'ka wehjoarichio tísia muuwaemekopa nanaarameo. ¹⁷Ka'te natakepaka mochtomitiapua, Riosikamera kaawe eratepua nokipuameo. ¹⁸Aamo kaaweruma Riosichi tetewipuawichioo, ka'te nawajimitia ihtaoi paatarieo, puuu paatario taamo ki inatepame enepatiamekopao, ihtaoi a'chi tiame ikiniameo; ohso kaawe ihtaoi itapiti a'chi tiame amochi ikisaa, aamo Noono tewekachi kahtiame paparaka, itanepuapua aamo ku'ika katewepuawichioo, waikao apoeopua, aamo ku'ika katewemapua ahpo Riosiwario. ¹⁹Eeme Riosie Weratiamerachi paparama, wa'amahka ta'pechi napawisaa, a'chitiaoi aamo peeniachitia nayewepuapua tewekachi Noonoo, Apoe Eesusiopua tiameo, ihtaoi Riosi iyotaperichi chiia iyonaio tiameo, ihtaoi Riosiwichio kaawe e'rewa wikatapuapua, nape te'ta aamo iikachi machename e'rewae. ²⁰Senepi Riosichi nayewaiio, ihtaoi itapiti nayewiaio, ka'te natekepamitia eemea, cheriwema kiamiao, Eesusi Riosie Weratiameo, pu'ka aamowichio iintoriopa.

Aachin teeka mochiniamenewikameo

²¹Eeme nenewikamea, nenekuti ahpo yoorewatere te'tereka mochtopuapua, wa'a tiame yachatiamekopua Riosie Weratiameo. ²²Eeme ujupiraa aamo kuunao, mo'orachitia teetoame tetewimitiapua, aamo kuuna neesetowatere mochtoka, ²³taamo Paamira Eesusio, yooma ahpo weerewa ki pusie teteiwamechi taamo te'teretoameo, apoe mo'orachitia teetoamekopa tamochio. Puuu Eesusi weerewa ki pusie teteiwamea, Riosi tioparakaitepua tiameo, pu'ka tiopa ki pusie teteiwamechi mochikamewichioo, Riosie Weratiamea ahpo ahjari nehjakamepua, pu'ka newipamichio, pu'ka tatakoria ahsieme cho'wepuawichioo. ²⁴Wa'achitia teemeai Riosie Weratiame ki pusie teteiwame tioparachi enepakamea, taamo Paamira Eesusio taamo mo'oratuamechitia tetewachitiao, wa'achitia eeme uupiraa aamo kuunao, wa'achitia aamo mo'oratuamechitia tetewimetepua, yooma itachioi, yooretoka. ²⁵Eeme kuunaraai, tísia kaawe nakika mochtomitiapua aamo uupio, Riosie Weratiamechitiao yooma ahpo tiopa ki pusie teteiwameo, nakika yasitoamechitia, pu'kao te'ta taamo nakiyapao, taamowichio ahpo mukiwarichi ki'yariopa. ²⁶Wa'a iintokame puuu ahpo mukiwachisi ki'yakao, taamo te'ta papakotiame itipimichiopua taamo tatakoriaio, te'ta ahsieme piipakame, ahpowichio taamo poanatakamekapapua. Wa'a iintokame Eesusi Riosie Weratiamea, taamo tatakoria cheriwepuawichio itanetiapao, taamoo neeroie paantonioopua. ²⁷Wa'a tiame iintokame Eesusi Riosie Weratiamea tamochio, te'ta ahsieme piipakame ne'netenariapapua, ahpo wa'apiopua.

Puuu te'ta taamo piipateriaapua, ki teesa tiame tatapara tiamepua piipario, teesaoui ki ohchoparieme, teesaoui kihta chu'ruame. ²⁸Eeme aamo uupi kuunaraa, aamo tísia weerewa nakiyachitia, wa'achitia nakipuapua aamo uupioi. Aaataai ahpo uupi te'ta tísia nakiyamea, ahpo wa'api nakiyamekai teereniamepua, ²⁹aaataai ahpo weerewao, ki'tiamekopua ahpo weerewa wa'api nekamuchiameo, wa'a tiamekapa puuuu ahpo weerewao, tísia kaawe ahpo neesetoamepua, tísia kaawe koi'teka. Riosie Weratiamea wa'achi ihsika taamo neesetoamepua ahpo tiopawao, puuu tiopa ki pusie teteiwamea, apoe wa'api weerewakapapua, weerewa ki pusie teteiwame. ³⁰Teemea pu'ka weerewa ki pusie tetewiniamechi te'teriamepua, pu'ka weerewachi piiripikame teemea, piiripi wa'api pirenaturichi. ³¹Wa'achitia Riosiai nengewikameo, piiripi weerewachitia pirenaturukame tetewamepua, Ehkoriai Iyoterio, te'ta eee chiiachitiao: “Aata tijoea toimeripua ahpo noonoo yeeyeopua tiame, ahpo uupimao piiripichitia enepamiapa pirenaturukao.” ³²Ihji pirenatuniamé piiripi weerewachitiao, tísia tehki tiamepua pahtepuawichioo, puuu piiripi weerewachitia pirenaturi enepaniameo, ki pusie teteiwamekapa. Wa'a te'teriame teemea, piiripi pirenaturi enepakamekapa, Eesusi Riosie Weratiamechío, ki pusie tetewiniamechi. ³³I'káo cheeriemekainia wa'asio, eenechi aamo chaaniamenia: Eeme kuunaraa, aamo wa'api aamo nakiyachitia, nakika yasitopuapua aamo uupio; eeme uupiraa, yooreka yasitopuapua aamo kuunao.

Tatanara nayewaniame, yayawara tiame

6 Eeme kukuchia, yooreka mochtomitia aamo yayawao. Puuu aamo yayawa yooreniamea, kaawerumapua, wa'a tiame nakiyame taamo Noonoo tewekachi kahtiamea. ²Iintuame piiripi nuurari Moisetaru Riosie kiatiamé, ti'tijoeo ooweruopua tiameo, e'weka mochtomichiopua. Riosia ahpo nuurari Moise ki'yaiopua tiameo, pu'ka nuurari yooreka yasitokameo, tísia kaawe ikitemo tuukamepua. Puuu nuuraria eee chiiamepua: “Yooremitia aamo noonoo, aamo yeeyeopua tiame.” ³Puuu Riosie iintomo tuuriaa, eee cheeriopao: “Aamo noonoo aamo yeeyeo tiame yooreka yasitosaa, tehpe weritomerimua ahjatokao.”

⁴Eeme noonoraa, ka'te nekaka tuuyemitia aamo tatanao; ohso kaawe kaawe e'reka tuuyepuapua masitekao, kaaweruma weripamichiopua pu'káo, yooreka yasitoame. Ki aamo e'wenaresoopua aamo tatanao, utewachi yooretépuapua pu'káo, a'chitiaoi aamo ye'kachitia masiteka, nape tísia nakika, kiisi nekaka; wa'a tiame nakiyame taamo Noonoo tewekachi kahtiamea.

⁵Eeme aaata aamo teeko tekipanakiamea, yooreka tekipanapuapua aamo teekochio, iyorika yorapuapua aamo tehki, kihta inasoame enepuapua, tijoeai oowitiameai, aamoo

Riosie Weratiame tekipanakiamechitia iyorika. ⁶Aamo teekoe ki tetewiniachi ihisiao, wa'api tiame enepuapua, ki aamo teekochiche kaawe aamo itipinarewaeoi, Riosie Weratiamechiopua tiamé, wa'a tiame kaawe e'riame Riosia. ⁷Wa'a tiachio aamo teekochi tekipanaio, Riosie Weratiamewichio, tekipanameka erapuapua, ki aaata ti'tijoe teekowichio, ooweruoi teekowichiooi. ⁸Nane'remitia eemea, puhku tekipanameo ki puhkuchitia tekipanameopua tiameo, wa'achitia kaawe yorapuamekopua Riosieo, yooma aaata ahkasi kaawe ahpo tekipanariachitiao.

⁹Eeme tekipaname teekoraai, aamo tekipanamechitia te'terepuapua, aamo yooreka tekipanakiamechitia, ka'te e'raka yooraka tetewimitiapua pu'kao, kaawe nane'riamekapa eemeapa, tewekachi kahtiamekopua te'ta aamo Teekora, aamoopua aamo tekipanateka iintuamea. Puuu aamo te'ta Teekoa, apoe Eesusi Riosie Weratiame puuu. Puuu Eesusi Riosie Weratiame aamo Teekoa, ki epeche weruma tiame tetewamepua aamoo, aamo tekipanakiamechio.

Ihtanae taamo nehpuameriko riaorósi na'ararichio

¹⁰Ehpeo neea, no'o iyotewachi kajuyachio, aamo riaorósi, ihtanae aamo nehpuamia, nayewemane. Eemea, riaorósi wihkuarichi aamo nehpuapuawichio, Riosie Weratiame itanepuapua aamo te'ta ahpo utewarie ku'imichio. ¹¹Eemea Riosie aawewiame enepuapua, ahjae aamo neesepuame riaorósi wihkuario. ¹²Apoe Riosi enemeru taamo ahjae nehpuameria, ki aaata ti'tijoechi nasiwaniamekopua, apoe te'ta Satanasikoopua taamo seepurawao, kihta sa'paeme ki eeraemeopua tiame. Taamo ahjachi nasiwaa, eekachi ohjoame ahjaripua, Satanasia ku'yamera ahjari, tísia nanaarame ti'tijoechichio. Puuu Satanasia ku'yamea, i'ka wehjoari tukaparichi tekipanamepua, te'ta Satanasie kiatiamé, te'ta utewarie kiatiamé i'ka wehjoarichi nokisimichio. ¹³Pukachipa Satanasia ki pusie teteiwamechi nasiwaniamekopua, yomatiamé Riosie aamo nehpuari amochi teeretopuapua, ahjae aamo aawemichio, Satanasia aamo wihkuwarichio. Wa'atiaomua kiisi yuumpatiame enesaamua Satanasia wihkuarie nanaarameopua, ma'chiamé teteipua enemamua Riosie Weratiamechi te'ta tiamekopua aamo paparao. ¹⁴Pukaepa eemea, pusakame mochtupua, kaawe aamo inateka. Satanasia aamo wihkuenaresoo, te'ta pichiware Riosi chiaae, nehjiaka aamo nehpuapuapua, pukae aamo nehpuamichio ki'yakame Riosia. Satanasia aamo chaanenaesoo: “Kiisi kaawe tiame muua Riosichio, tísia wihtuka chiame muua”, chaanepuapua pu'kao: “No'oo tísia kaawe tiamekopua Riosichio, no'o Riosichi paparakopa no'o cheriwepua.” ¹⁵Kaawe katewetiame mochipuapua, aamo wahjachi

nayewemia Riosi kaaweruma tuuyewario, Riosie aamo iikachi ta'iria yasitowa eraniameo, Riosie taamo kianiameopua. ¹⁶Riaorósio aamo sewina erapatenaríoo, ki aamo ahjama tiopa Riosio aamo ku'ikao, aamo Riosichi paparae aamo nehpuapuapua, pukae aamo pejanaweka, choipatepuapua riaorósi ataporirao, taamo ki kaaweruma iintojeraopua, tajenarieme. ¹⁷Pu'ka Riaorósio aamo sewina erapatenaríoo: “Ki Riosie aamo newipatetiameko”, chaanesoo, peeneka aamo nehpuapuapua, tísia wihtuameko tuuka pu'kao. Puuu tísia peeneka aamo inatawae nehpuawaa, soontaro kajewa mo'koritoniameka tiamepua. Riaorósi wa'a mahka amochi eenaka itapiti ki kaaweruma Riosiwichio, aamo weemupanaresoo iintojerakao, Riosi Iyoterichi chiiie aamo nehpuapuapua, Riosi Riosiwarie ku'iwao. ¹⁸Senepi kukuwe Riosichi itaka mochtitopuapua aamo ku'iwao, apoe aamo chaanesimichiopua, pukae aachin teeka aamo nehpuasimichiopua, Satanasi na'ararichio. Wa'achi cheeka nehpuapuapua yooma aamo wahjachiwichio itakao, Riosi Riosiwarichio. ¹⁹No'owichioopua tiame itapuapua Riosio, ma'chiamie ki seeweka no'o masitemichiopua, ahpo Taana Eesusi simiyameo, yooma pu'ka kaaweruma Riosi tuuyewario, ki ma'chitaniame pehji, ehpe taawechiamio noriwi teereniame pehji. ²⁰Neeea pu'ka tuuyewari nayewatuapa, i'wa yachatiamenia peereso, Riosi no'o chaanesiwa nayewatuamekapa. Te'ta itaka mochtomitipua no'owichio ehpe i'wa no'o kahtioiopua peereso, Riosio no'o ku'imichiopua, no'o oisatia nayewamichiopua, te'ta kaawe no'o teetomichiopua, Riosi nakiyachitia.

Kajuyachi teepotari

²¹Ehpeo neee Paoroa wa'a Eejesio tiopachi mochikameo, wa'a aamo uhjurenane Tikikoo, taamoo Riosichio pooniwaka tiame, puuu tísia yokipakame puuupa Riosie Weratiamechio, puuu tísia kaawe no'o ku'ikamepua tiameo, Riosi tehkiwa nokiwachio. Tikikoeo neee, wa'a aamo i'tochenania, yooma aachin teetoa tamochio i'wa, puuu aamo mochikachi asisaapa, puuu ihsimapua yooma aamo tuuyekao, aachin teeka taamo mochikaopua i'wa, ²²aamoo kaawe erakomichiopua, taamo kaawe te'terio tuuyetiopa Tikikoeo. ²³Yooma eeme Riosichi poponiwa pipiniwaopua tiame, Riosi ihsijerania amochio, ta'iria mochitekaopua aamo iikachio, Riosio amochi teerejerania tiameo, te'ta aamo ahpo nakika mochtitoniame; aamo ku'imichiopua tiameo, ki se'wika aamo teetowetekao, aamo te'ta paparawaopua, ahpo Taana Eesusichio. ²⁴Yooma aamo taamo Paamira Eesusichi tísia ki wahjiamesi nakika ahjachi paparaka mochitoameo, Riosio neee, te'ta kaaweruma ikiwame amochi teewejerania, ahkasi ki wahjiamesi.

Wa'asi kajuyamenia i'ka no'o aamo uhjuriaa, i'ka tuuyewari aamowichio iyotiao. Kaawe erakosa naajúu, cheriwema wa'asi.